

Primeiru-Ministru diskorda ho proposta Lei Kriminaliza Difamasaun



Primeiru-Ministru, Kay Rala Xanana Gusmão. Imajen TATOLI/Egas Cristóvão.

DILI, 16 Jullu 2026 (TATOLI)-Primeiru-Ministru, Xanana Gusmão, informa katak nia parte la konkorda ho proposta Lei Kriminaliza Difamasaun ne'ebé antes ne'e Parlamentu Nasionál halo diskusaun.

“Ha'u la konkorda Lei Kriminaliza Difamasaun ne'e, tanba lei ne'e mosu, imi-nia mídia sosiál ne'e sei iha problema boot liu fali agora. Agora, temi dehan lalika, maibé ita provaka buat ida ho imi-nia mídia sosiál falsu sira ne'e, ida-ne'e, ein vez Tribunál bá haree kazu sira ne'ebé rihun ba rihun seidauk rezolve ne'e, bá haree fali buat ki'ik ida tolok malu sira ne'e”, Xanana hateten iha Palásiu Prezidensiál Bairu Pité, Dili, hafoin enkontru ho Prezidente Repúblika, José Ramos-Horta, ohin.

Xefe Governu ne'e esplika katak nia parte la konkorda ho lei ne'e, tanba oinsá mak atu define klaru ba difamasaun no insultu ne'e. “Ha'u la konkorda tanba difamasaun ne'e ita insulta oinsá, difama to'o iha ne'ebé? Ita rona iha Parlamentu bla...bla...más buat ne'e iha sociedade laran ne'e imi kala difama malu ne'e mak hirus malu mak tau iha Tribunál”, nia dehan.

Lembra katak iha loron 13 Jullu 2026, Prezidente Parlamentu Nasionál, Maria Fernanda Lay, hasoru malu ho Prezidente Repúblika, José Ramos-Horta, hodi informa katak nia parte suspende diskusaun kona-ba proposta Lei Kriminaliza Difamasaun no Injúria iha faze jeneralidade, ne'ebé tuir planu atu debate iha plenária iha semana kotuk.

Nia parte suspende tanba to'o iha Parlamentu Nasionál haree katak pareser balun la haree ba kontestu lei rai-laran.

Jornalista: Arminda Fonseca

Editora: Maria Auxiliadora

PM Xanana Ladun Konkorda, Enkuantu NGO La'ó Hamutuk Rejeita Total Projetu Lei Kriminaliza Defamasaun

DFM News, 17 July 2026: Primeiru-Ministru Kay Rala Xanana Gusmão hatete nia ladun konkorda ho projetu lei kriminaliza defamasaun no injúria ne'ebé Parlamentu Nasional sei diskute, tanba Timor-Leste iha ona mekanizmu legal atu trata kazu hanesan ne'e.

“Problema sira ne'ebé mosu iha media sosial, inklui informasaun falsu, labele resolve de'it ho lei kriminal. Tribunál mak tenke haree no determina karik iha defamasaun ka lae,” dehan Primeiru Ministru Xanana Gusmão ba jornalista sira, hafoin hala'o innkontru ho Prezidente Repúblika José Ramos Horta, Iha Palasaiu Prezidensial, Kinta (16/7/2026).

Projetu lei refere mak proposta atu halo alterasaun ba Kódigu Penal, liuhusi aumenta artigu foun kona-ba kriminalizasaun defamasaun no injúria.

Iha sorin seluk, peskizadora Lao Hamutuk, Elia da Costa, hatete proposta kriminalizasaun defamasaun la'ós buat foun. Tuir nia, Ministériu Justisa iha tinan 2020 mos apresenta ona proposta hanesan, maibé la kontinua tanba hetan opozisaun husi públiku no organizasaun sira.

“Iha tinan 2020, proposta ida-ne'e la kontinua tanba hetan kestaun barak husi públiku, tanba konsidera katak bele kontra direitus umanus no liberdade espresaun ne'ebé garante iha Konstituisaun,” hatete Elia da Costa mai priense programa TalkShow “Dadalia”iha estudiu DFM.

Elia esplika Lao Hamutuk apoia alterasaun sira kona-ba asesu seksuál no abuzu seksuál, tanba konsidera importante atu proteje vítima no prevene krime sira-ne'e. Maibé, organizasaun ne'e rejeita total artigu kriminalizasaun defamasaun ne'ebé prevê pena prizaun entre tinan ida to'o tinan tolu.

“Kriminalizasaun defamasaun la'ós solusaun. Timor-Leste iha ona Kódigu Sivil atu trata kazu defamasaun no ofensa. Governu no Parlamentu di'ak liu hadi'a implementasaun mekanizmu sivil no kapasidade instituisaun sira,” dehan Elia.

Nia mos alerta katak kriminaliza defamasaun bele fo impaktu ba liberdade espresaun no demokrasia.

“Kritika ba interesse públiku labele responde ho sansaun kriminal. Lei ida-ne'e bele limita liberdade espresaun no enfraquece demokrasia iha Timor-Leste,” konklui Elia da Costa.

To'o agora, Parlamentu Nasional seidauk foti desizaun final kona-ba proposta lei kriminaliza defamasaun. Enkuantu debate kontinua, Governu no organizasaun sosiedade sivil hein katak diskusaun sei garante balansu entre protesau ba ema nia naran diak no liberdade espresaun ne'ebé garante iha Konstituisaun.

Jornalista : Anibal do E.Santos Editora :Ligia Noronha